

Kelapa sawit sumbang kenaikan sektor pertanian

Sektor pertanian meningkat 0.1 peratus pada 2022 berbanding negatif 0.1 peratus pada tahun sebelumnya, disumbangkan komoditi kelapa sawit yang mencatatkan pertumbuhan positif 3.8 peratus.

Ketua Perangkawan Malaysia, Datuk Seri Dr Mohd Uzir Mahidin, berkata kelapa sawit adalah penyumbang utama kepada nilai ditambah sektor pertanian dengan RM36.1 bilion atau 36.5 peratus, diikuti pertanian lain (RM28.1 bilion atau 28.3 peratus) dan ternakan (RM16.5 bilion atau 16.7 peratus).

Beliau berkata, pengeluaran tanaman komoditi utama pada 2022 masih mencatatkan penurunan berbanding 2021 kecuali buah tandan segar sawit dan lada.

Katanya, pengeluaran sayur-sayuran di Malaysia menunjukkan peningkatan 7.0 peratus pada 2022 dengan Pahang kekal sebagai pengeluar tertinggi, diikuti oleh Johor dan Kelantan.

“Sektor pertanian penting bagi memastikan bekalan makanan dalam negara sentiasa mencukupi. Di samping itu, sektor pertanian juga memainkan peranan yang penting di dalam ekonomi negara melalui sumbangannya kepada pendapatan negara dan perolehan eksport,” katanya dalam satu kenyataan.

Mohd Uzir berkata, perdagangan Malaysia telah menunjukkan perkembangan positif apabila jumlah eksport agromakanan dan hasil pertanian terpilih negara meningkat daripada RM154.5 bilion pada 2021 kepada RM188.6 bilion pada 2022.

Pada masa yang sama, beliau berkata, jumlah import agromakanan dan hasil pertanian terpilih turut meningkat kepada RM144.4 bilion pada 2022 berbanding RM120.5 bilion pada 2021.

“Namun, sekiranya melihat kepada import makanan terkumpul Malaysia secara keseluruhan bagi tempoh lima tahun (2018-2022) berjumlah RM296.4 bilion, meningkat 31.8 peratus berbanding lima tahun sebelumnya sebanyak RM224.9 bilion (2013-2017),” katanya.

Perangkaan DOSM juga menunjukkan bilangan penerima gaji dan upah bagi pekerja mahir pertanian, perhutanan, penternakan dan perikanan pada 2022 adalah seramai 86,600 orang.

Penengah gaji dan upah bulanan yang diterima bagi pekerja mahir adalah RM1,764 dengan pekerja lelaki RM1,779 dan perempuan RM1,531.

Sementara gaji dan upah purata bulanan yang diterima pula adalah RM2,011 dengan pekerja lelaki menerima RM2,033 dan perempuan RM1,831.

Produktiviti buruh bagi sektor pertanian merosot sebanyak 1.2 peratus bagi tempoh 2021 hingga 2022.